

Հայոց անեղծ մնալ՝ Միւֆթի, Քաղաքապետան և Դպրապետ դատարանի, 'ի ձեռն որոյ գրեալ են Հէօճէթքն, ընթերցցին զգրեանս և մանրամասն քննութեամբ որոշեալ մաքրեսցեն շինութիւնք տեղւոյն այնորիկ :

Միւֆթի Էֆէնտի . երկոքին հրովարտակքն պարունակեն զխնդիր շինութեան, պատարագելոյ և զկանթեղս կախելոյ . վերջինն 'ի հաստատութիւն առաջնոյն է տարբեր թուականաւ և արձանագրութիւնն ջնջեալ . և 'ի մասին շինութեան չուցի զօրութիւն . այլ բարւոք թուի որոշել, թէ ո՞րք համաձայն հրովարտակին են, և ո՞րք հրամանաւ Դատաւորին . հրովարտակք հրամայեն 'ի վերայ նախկին դրից, ո՞ր տեղիքն 'ի վերայ նախնի հիման՝ և ո՞ր տեղիքն արտաքոյ նորին են . որովհետեւ բողոքողք Յոյնք են, նոցա պարտ է որոշել և պատմել . եթէ Հայք հաստատեսցեն զնոսին, բարի, իսկ եթէ հակառակեսցին, ըստ մտաց հրովարտակաց վարիմք և համոզեմք զերկոսին կողմն : Դպրապետ դատարանի ասէ՝ երկոքին հրովարտակքն Հայոց զխնդիր նորոգութեան պարունակեն, որպէս ասաց Միւֆթին, և գործ շինութեան յանձնեալ է Յունաց, արգելեալ զՀայս, ուստի հարկ է ջնջեալ համարիլ զառաջին հրովարտակն Հայոց, և եթէ չլինի եւս, չուցի զօրութիւն վասն շինութեան : Սակայն նախ պատմեսցեն Յոյնք զգործ շինութեան, և յետ այնորիկ խօսեսցուք :

Փոխանորդն Յունաց . Աւելորդ և արտաքոյ Հէօճէթից շինուածքն են այսոքիկ . երես արտաքին դրան երկաթապատ լինին, և 'ի վերայ դրան այնորիկ 'ի ներքին կողմն Հայկական արձանագրութիւնն . կանթեղք կախեալ 'ի տախտակամածէ, պատկերն 'ի վերայ դրան գմբէթին, երկաթի ծորակաւ փոքր լուսցարանն 'ի դաւթին . վերին յարին 'ի վերայ սենեկի լուսարարին եւ դուռն նորին, քարեայ սանդուխն երկաթի յենարանաւ . մի փոքր սրձարան կից սենեկաց 'ի վերայ ձիթահանին, և ներքին մեծ սենեկի արտաքին դուռն երկաթապատ . այսոքիկ շինուածովք ձեւացեալ է մի փոքր վանք . Տեսուչն եւ սպասաւորքն յայտ առնեն զմշտնջենաւորութիւն նորին . և եթէ քննեսցին, դիւրաւ յայտնի ճշմարտութիւնն, և ոչ է պարտ մեզ քննել և որոշել զամենայնն մի ըստ միով : այլ պաշ-